

金史


卷十六之十九

第五

525

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUL 30 1936

T 2455/21



Harvard College Library Imaging Services <http://imaging.harvard.edu>

第十六

金史十六

塔佛大學漢和
圖書館珍藏

元開府儀同三司上柱國前中書右丞相監修國史

都總裁臣脫脫修

宣宗下

四年春正月壬辰朔詔免朝丙申金安軍節度使行元帥
府事古里甲石倫除名丁酉大元兵下好義堡霍州刺史
移刺阿里合等死之詔贈官有差庚戌宋步騎十餘萬圍
鄧州聞援軍至夜焚營去招撫副使木虎移刺谷追及之
奪其俘還壬子晝晦有頃大雷雷雨以風癸丑戶部侍郎
張師魯上書請遣騎兵數千及春淮蜀並進以撓宋丙辰

以武仙遙領中京留守進官一階三月辛丑議遷睢州治
書侍御史蒲魯虎奉詔相視京東城池還言勿遷便乃止
癸卯長春節詔免朝乙巳林州元帥惟良擒叛人單仲李
俊誅之降其黨盧廣已酉以吏部尚書李復亨參知政事
南京兵馬使木甲賽也行懷孟帥府事辛亥進平章政事
高汝礪為尚書右丞相監脩國史封壽國公參知政事李
復亨兼脩國史平章政事陝西行尚書省晉鼎進封溫國
公致仕壬子紅襖賊于忙兒襲據海州經略使完顏陳兕
以兵擊敗忙兒復取之甲寅木星犯鬼宿積尸氣夏四月
庚申朔詔御史中丞完顏伯嘉提控防城事癸亥安武軍

節度使柴茂破紅襖賊于棗強祁州經略使嚴增相賊反
賊甄全于唐縣夏人犯邊元帥石盞合喜破之乙丑以彰
德衛輝滑濟諸州隸河南路轉運司以河南路轉運司為
都轉運視中都增置官吏戊辰禘于太廟大元遣趙瑞以
兵攻孟州提控曾德王安復大名府以參知政事把胡魯
權尚書右丞左副元帥元帥左都監承立為右監軍權參
知政事同行尚書省元帥府于京兆庚辰東平元帥府總
領提控蒲察山兒破紅襖賊于聊城壬午命六部檢法以
法狀親向部官聽其面議大理寺如之五月壬辰定二品
至三品立功遷官格癸巳紅襖賊寇樂陵監山橫海節度

使王福連擊敗之張聚來寇又敗之甲午上擊鞠于臨武
殿丙申以時暑免常朝四日一奏事丁酉諭工部暑月停
工役癸卯大元兵徇隩州丙辰大元兵徇兗州泰定軍節
度使完顏長可死之六月丙寅遣人招張柔丁卯詔減監
察御史四員戊辰山東民僑居者募壯士五百人益東莒
公燕寧軍日犯土星己巳太白晝見于張百八十有四日
乃伏甲戌制諸倉場庫院巡護軍受提舉倉場司及監支
納官彈壓京畿不雨勅有司闕獄雜犯死罪以下皆釋之
丁丑大元遣楊在攻下大名又攻開州及東明長垣等縣
己卯祈雨庚辰宋人方子忻來歸有司處之鄭州上曰吾

民奔宋者彼例衣食之彼來歸者不善視之或復逃歸漏
泄機事命增子忻廩給有司優遇之元帥右監軍權參知
政事承立上封事秋七月辛卯宋人及紅襖賊犯河朔諸
郡皆降獨滄州經略使王福固守會益都賊張林來攻福
乃叛降林帥府請討之是日雨癸丑林州行元帥府遣總
領嚴祿等討紅襖賊于彰德府生擒偽安撫使王九詔參
知政事李復亨為宣慰使御史中丞完顏伯嘉副之循行
郡縣劭農以烏古論仲端等使大元八月戊午朔嚴實戍
江王贊據濟南山東招撫高居實遣人招嚴實于青崖砦
獲其款以聞李全犯東平府監軍王庭玉敗之擒其偽安

化軍節度使張林庚申高陽公張甫請增兵守冀州上諭
樞密潁州民渡淮爲宋軍者凡十村可追索主者懲一二
以誡其餘庚午勅掌兵官不聽舉縣令夏人陷會州刺史
烏古論世顯降甲戌陝西行省報龜谷敗夏人之捷乙亥
上諭宰臣河南水菑唐鄧尤甚其被菑州縣已除其租餘
順成之方止責正供和糴雜徵並免仍自今歲九月始停
周歲桑皮故紙折輸流民佃荒田者如上優免丙子陝西
行省與夏人議和戊寅定選補親軍法己卯罷葭州招撫
司壬午陝西路行省承裔報定西州之捷丙戌以隨路諸
軍戶徙河南京東西南路各設檢察使副恒山公武仙降

大元九月戊子詔遣官于河南陝西選親軍李邠進章宗
實錄戊戌大元不華里屯軍真定置總領元帥府于歸德
以壽州陳留兩鎮兵屬之庚子夏人入定西州壬寅宋人
屯皂郊堡行軍提控完顏益都擊敗之大元遣塔忽等來
癸卯夏人來侵甲辰滕州招捕提控真義勇討紅襖賊敗
之乙巳詔參知政事李復言提控芻糧事己酉夏人陷西
寧州尚書省都事僕散奴失不坐誅駙馬都尉徒單壽春
奪官一階杖六十癸丑更定安泊逃亡出征軍人罪及捕
獲官格甲寅宋人出秦州及夏人來侵丙辰鞏州行元帥
府事石盞合喜報定西州之捷冬十月壬戌大元遣蒙古

塔忽訛里刺等來已卯陝西東路行省報綏德州之捷泗
州元帥府言紅襖賊一月四入寇掠人畜而去庚辰上擊
鞠于臨武殿辛巳授紅襖賊時青滕陽公本處兵馬總領
元帥兼宣撫癸未京西山寨各設守禦使副令本路帥府
總之諭陝西行省圖復會州上擊鞠于臨武殿十一月丁
亥朔免越王永功朔望朝參易水公靖安民為其下所殺
戊子苦陵壩經略使烏古論石虎等以戰陣失律伏誅壬
辰木星書見于翼積六十有七日伏夜又犯靈臺第一星
甲午河南水遣官勸課更浮山縣名忠孝戊戌詔復衛紹
王王爵仍加開府儀同三司壬寅山東東路軍戶徙許州

命行東平總管府治之判官一人分司臨穎乙巳詔柴茂
權元帥左都監蓋仁貴攝右都監同行元帥府于真定是
月大元木華里國王以兵圍東平十二月甲戌祈雪禮部
郎中權左司諫抹撚胡魯刺上封事戊寅詔軍官許月擊
鞠者三次以習武事庚辰臘享于太廟乙酉鎮南軍節度
使溫迪罕思敬上書言錢幣稅賦二事

五年春正月丙戌朔免朝丁亥世宗忌日謁奠于啓慶宮
戊子拓南京諸河逋戶舊耕官田給軍戶壬辰議禦西夏
及征南事諭皇太子以東平禦敵方略甲午諭樞密院南
伐事車當詳議其便撰故衛王事跡如海陵庶人例丁酉

大元兵攻天井關戊戌宋人襲泗州西城提控王祿死之
辛丑太白晝見于牛二百三十有二日伏乙巳詔諸道共
集蔡州己酉伐宋庚戌山東行省報東平之捷二月丙辰
朔置招撫司于單州曲赦東平府庚申下詔伐宋以內族
惟弼權同簽樞密院事行院于中京幹勒合打權元帥府
右都監行元帥府于蔡息納合降福權簽樞密院事行院
于宿州李木魯達阿權元帥右都監完顏訛論副右都監
行元帥府于唐鄧戊辰罷懷州行元帥府復置招撫司與
孟州經略司並受中京行樞密院節制辛未僕散安貞以
兵出息州破宋人于淨居山寺拔黃土關癸酉以旱災曲

赦河南路丙子禁京城兵器元帥紇石烈牙吾塔破宋兵
復泗州進逼濠州至渦口之糧而還西城癸未以旱災詔
中外三月丙戌朔上御仁安殿祈雨仍望祭于北郊庚寅
宋人圍唐鄧行元帥府事完顏訛論力戰却之前鄧州千
戶李木魯毛良虎自拔歸國訛論便宜遷其官三階授同
知唐州事乞正授以示信從之乙未罷河南路行三司丙
申參知政事徒單思忠進尚書右丞兼脩國史以太子詹
事僕散毅夫為參知政事諭宰臣曰今奉御奉職多不留
心采訪外事聞章宗時近侍人秩滿以所采事定計降今
亦宜預為效覈之法以激勸之戊戌長春節免朝己亥夏

因叛人竇趙兒之招入據來羗城亭木魯合佳以重賞誘脅從人爲內應督兵急攻城拔之省試經義進士考官於常額外多放喬松等十餘人有司奏請駁放上已允尋復遣諭松等曰汝等中選而復黜不能無動于心方今久旱恐傷和氣令特恩放汝矣庚子賜林州行元帥府經歷官康瑒進士及第瑒以武階乞赴廷試故有是命丙午以旱築壇祀雷雨師壬子雨四月己未山東行省蒙古綱言東莒公燕寧戰敗而死寧所居天勝砦據險寧亡衆無所歸變在朝夕權署其提控孫邦佐爲招撫使黃摑兀也爲總領以撫其衆遣使請命勅有司議之辛酉禱雨于太廟丙

寅僕散安貞破宋黃蘄等州壬申俘宋宗室男女七十餘口獻于京師癸酉詔親軍中武舉第而授職需次者仍執舊役廩給循常闕至發遣辛巳監察御史劉從益以彈劾失當奪官一階罷之詔定進士中下甲及監官散階至明威者舉充縣令法五月甲申朔日有食之戊戌宋人據楚丘官軍復之庚子納蘭記僧伏誅告人趙銳升職四等壬寅陝西元帥完顏賽不遣使來獻晉安平陽之捷方議其賞御史烏古論胡魯劾其縱將士鹵掠不副主上除亂拯民之意乞正其罪上以賽不有功詔勿問賞議亦寢癸卯唐州守將訛論爲元帥賽不猶子與宋人戰唐州境上爲

宋人所敗死者七百餘人匿之而以捷聞御史納蘭發其事上以蹇不故亦不之罪而以是意諭之乃稱納蘭敢言錄其功付有司秩滿考最癸丑東平內徙命蒙古綱行省于邳州王庭玉行帥府于黃陵綱六月甲寅朔尚書省奏駙馬都尉安真反狀上閱奏慮其不實謂平章政事英王守純曰國家誅一大臣必合天下後世公議其令覆按之乙丑遣使諭晉陽公郭文振上堂黑公完顏開各守疆土同心濟難毋以細故啓釁端誤國由是安真坐謀反并其三子皆伏誅己卯越王未功薨庚辰輟朝壬午上親奠于殯所秋七月己亥義勇軍都統據碭山縣庚子詔增給

徐州清口等處戍兵衣糧己酉碭山賊夜襲朮城縣行軍副總領高琬敗之命蒙古綱併力討捕辛亥單州招撫劉瓊乞移河南糧濟其軍詔給之八月壬子朔罷黃陵綱招撫司上諭尚書省碭山叛軍家屬囚歸德旬餘不給糧恐傷其生宰臣奏已給之矣又諭樞密河北艱食民欲南來者日益多速令渡之毋致殍死癸亥林懷帥府邀擊紅襖賊于伏恩村敗之甲子詔南征清軍復歸而能力戰者依出界立功格賞之乙丑宋人掠沈丘殺縣令甲戌命有司除逋戶負租毋徵見戶九月甲申以京東歲饑多盜遣御史大夫紇石烈胡失門為宣慰使往撫安之更定監察御

史違犯的決法丁亥詔州府及軍官捕盜慢職四品以下
宣慰使決之三品以上奏裁戊子增授隰州招撫使軒成
官改授西省節制乙巳崇進駙馬都尉定國公徒單公弼
薨庚戌歲星犯左執法右丞相高汝礪表乞致仕詔溫留
之冬十月癸丑進汝礪官榮祿大夫命僕散毅夫行尚書
省于京東督諸軍芻糧乙卯太醫侯濟張子英治皇孫疾
用藥瞑眩皇孫不能任遂不療罪當死上曰濟等所犯誠
宜死然在諸叔及弟兄之子便應准法行之以朕孫故殺
人所不忍也命杖七十除名尚書省言司縣官貪暴不法
部民逃亡既有決罰他縣停匿亦宜定罪隨處士民又困

徭役客戶販鬻坐獲厚利官無所斂亦宜稍及客戶以寬
士民行院帥府幕職雖無部衆亦嘗替書戎功而推賞止
進官一階宜聽主將保奏第功行賞上皆從其請戊午遣
親軍討河南群盜辛酉大元兵攻綏德州壬戌夏人復侵
龕谷甲子勅監察所彈事同列不可預聞著爲令丁卯夏
人犯定西積石之境戊寅分京畿戍卒萬二千河中民兵
八千以許州死帥紇石烈鶴壽將之屯潼關西十一月癸
未陝西東路行省報安塞堡敗夏人之捷甲申諭六府減
損食品庚寅募民興南陽水田壬辰太子親王百官表賀
安塞堡之捷却之乙未夏人攻龕谷宋人攻蘄縣紅襖賊

掠宿州辛丑詔蠲徐邳宿泗等州逋租官民有能墾闢閒田除來年科徵歸德毫壽穎停閣逋戶租外仍蠲三之一逋戶田廬有司募民承業禁其毀損以俟來復蒲城縣民李文秀等謀反伏誅壬寅宋人焚穎州執防禦判官而去是日相國寺火大元兵攻延安十二月辛亥朔以太元兵下潼關京兆詔省院議之壬子罷辟舉縣令法丁巳禮部侍郎烏古孫仲端翰林待制安庭珍使北還各遷二階庚申罷河南義軍丁卯詔罷新簽民軍減樞密院掌兵官及京城戍兵仍諭行院帥府毋擅增設補簽辛未罷行總管府及招討統軍檢察等司定宋人來歸賞格及詐誘征防

軍人逃亡罪法癸酉元帥合達買往及其將士以延安功特賞賚之仍下詔獎諭閏月辛巳朔大元兵徇鄜州保大軍節度使完顏六斤權元帥左都監紇石烈鶴壽右都監蒲察婁室遙授金安軍節度使女奚烈資祿皆死之乙酉提控木甲咬住破沈丘賊于陳瓦丙戌頒詔撫諭河南土寇戊子熒惑犯軒轅己丑孫瑀及捕盜官吾古出招降泰和縣賊二千人詔斬其首惡餘皆釋之同知保靜軍節度使郭澍以徵糧失期誣殺平民坐誅辛卯官軍復葭州癸巳通遠軍節度使李木魯合往削官甲午月犯熒惑丙申紅襖賊夜入蒙城縣官失其符印軍民死者甚衆賊大

掠而去戊戌鎮星書見于軫己亥發兵捕京東盜太白晝
見于室壬寅發上林署粟賑貧民陳臺等州鹿邑城父諸
縣盜蜂起趣樞府遣官討之捕盜軍所過殘民遣御史一
人按視軍所獲牛有司以官錢收贖戊申詔定招捕土寇
官賞格已酉更造興定寶泉每一貫當通寶四百貫

元光元年春正月庚戌朔免朝辛亥世宗忌辰謁奠于啓
慶宮元帥惟弼破紅襖賊于張騫店壬午遣官墾種京東
西南三路水田甲寅禁非邊關急速事無馳傳即濫乘者
州縣徑白省部四方館從御史臺外路從分按御史治之
詔陝西西路行省徙京兆者兵退還治平涼防州刺史把

移失刺以棄城伏誅鄭州防禦使裴滿羊哥同知防禦使
古里甲石倫除名西面節度使把古乃住奪官一階丁卯
詔撫諭京東百姓壬辰詔徙中京唐鄧商號許陝等州屯
軍及諸軍家屬赴京兆同華就糧屯二月乙酉陝西西路
行省請以厚賞募河西諸蕃部族寺僧圖復大通城命行
省樞密院籌之癸巳上諭宰臣宋人以事兵攻平輿褒信
我師力戰却之又偵知其事狀之詳若俟帥府上功推賞
豈急於勸獎之道其遣清望官齎空名宣勅覈實給之乙
未詔諭河南陝西大元兵屯葭州壬寅權定行省樞府元
帥府輒校左右司經歷司官罪法甲辰上念鄜延被兵又

延安受圍嘗發民粟給軍詔除延安鄜坊丹葭緜德稅租
仍令有司償其粟直不足者許補官戊申恒州軍變萬戶
呼延斌等千餘人殺掠城中焚廬舍而去己酉遣元帥左
監軍訛可行元帥府事節制三路軍馬伐宋向簽樞密院
事時全行院事副之三月辛酉宋人掠確山縣之劉村丙
寅歲星犯太微左執法戊辰樞密院委差官賈天安上書
言利害壬申尚書右丞徒單思忠以病馬輸官買取高價
御史劾之有司以監主自盜論死上顧惜大體降授陳州
防禦使癸酉提控李師林敗夏人于朮木嶺郭文振表近
得俘者言南北合兵將攻河南陝西詔樞密備禦夏四

辛巳以金吾衛上將軍勸農使訛可簽樞密院事置大司
農司設大司農卿少卿丞京東西南三路置行司並兼採
訪事壬午大元兵攻陵川縣丁酉林懷路行元帥府事惟
良削官兩階罷之更定辟舉縣令之法而復行之戊戌籍
丁憂待闕追殿等官備防秋丁未行樞密院報淮南之捷
五月戊申朔大元兵屯隰吉翼等州壬戌訛可時全軍大
敗甲子訛可以敗績當死上面數而責之勉其後效命賧
官兩階丁卯召致政胥鼎等赴省議利害壬申時全伏誅
六月戊寅朔造舟運陝西糧由大慶關渡抵湖城癸未大
赦陳州防禦使呂子羽坐之軍興自盡制諸監官及八品

以下職事丁憂待闋任滿送授者試補侍衛親軍命各路
司農司設捕盜方略丁酉紅襖賊掠柳子鎮驅百姓及驛
馬而去提控張瑀追擊奪所掠還僞監軍王二據黎陽縣
提控王泉討之復其城七月庚戌大元將按察兒以其衆
屯晉安冀州之境丙辰上黨公完顏開復澤州己未歸德
行樞密院王庭玉報曹州破紅襖賊之捷庚申定監當官
選法河北群盜犯封丘開封畧令樞密院御捕甲子京東
總帥紇石烈牙吾塔請自今行院帥府幕職有過得自決
之不允戊辰紅襖賊襲徐州之十八里砦又襲古城桃
官軍破之乙亥太白晝見經天與日爭光八月丁丑定

征將士官賞有差己卯彗星見西方甲申增定藏匿逃亡
親軍罪及告捕賞格積石州蕃族叛附于夏鞏州提控尼
庵古三郎討之獲羊千口進尚膳詔却之以彗星見改元
大赦諭旨宰臣曰赦書已頒時刻之間人命所係其令將
命者速往計期而至以大司農把胡魯為參知政事癸巳
河間公移刺衆家奴高陽公張甫兵復河間府是日報捷
者始達上以道途梗塞報者艱虞命厚賞之夏人入德順
壬寅祈雨九月丙午朔以左古懿巡使兼彈壓諭陝西行
省備邊壬子牙吾塔請以兵由壽州渡淮擣宋人巢穴不
從乙卯議經略淮南己巳宋人掠遂平縣之石砦店復侵

南陽唐州提控夾谷九住敗之冬十月丁丑夏人掠德順
之神林堡壬午宋張惠攻零子鎮爲韓魯所敗虜其裨
將二人河中府萬戶孫仲威執其安撫使阿不罕胡魯刺
據城叛陝西行省遣將討平之癸未復曹州甲申上獵于
近郊詔免百官送迎且勿令治道以勞百姓庚寅徙彰德
招撫使杜先軍於衛州乙未大元兵下滎州之胡壁堡及
臨晉庚子詔所司巡護避兵民資產甲辰以京兆官民避
兵南山者多至百萬詔兼同知府事完顏霆等安撫其衆
十一月丁未大元兵徇同州定國軍節度使李復亨尙知
定國軍節度使訛可比自自盡甲寅京東總帥牙吾塔報臨

淮破宋兵之捷戊辰大元蒙古蒲花攻鳳翔府十二月乙
亥朔上謂皇太子曰吾嘗晝夜思天下事必索燭以記明而
即行汝亦當然以河中丞小叔權元帥元帥右都監
便宜行事乙酉遷同知平陽府事史詠龍虎衛上將軍賜
號守節忠臣權行平陽公府事丁亥疊州總管青宜可卒
特命其子角襲職詔諭近侍局官曰奉御奉職皆少年不
知書朕憶曩時置說書人日爲講論自古君臣父子之教
使知所以事上有其復置己丑蘭州提控唐括昉敗夏人
于膺孤堡大元以大軍攻鳳翔

二年春正月甲辰朔詔免朝賀乙巳世宗忌日謁奠于啓

慶宮右丞相汝礪乞致政上面諭使留大元兵下河中府
權元帥右都監侯小叔復之子子壽州防禦使完顏乃刺
奪官四階甲寅上諭宰臣曰向有人言便宜事卿等屢奏
乞作中旨行之帝王從諫足矣豈可掠人之美以為己出
哉戊午四方館使李癘驢以罪罷宰臣請以散地羈縻之
上曰此輩豪傑正須誠待若以術制適使自疑但不異軍
政外補何害授癘驢恒州刺史又謂驚爵恩例有丁憂官
得起復者是教人以不孝也何為著此令哉丁卯大元兵
復下河中府二月甲戌朔皇后生辰詔免賀禮己卯丞相
汝礪朝會免拜設榻殿下又立賜休壬午詔軍官犯罪舊

制更不任用今多故之秋人才難得朕欲除大罪外徙刑
追配有武藝善掌兵者量才復用其令尚書省議以聞丁
亥大赦己亥鳳翔圍解石夏合喜加金紫光祿大夫升左
監軍特授大名府海谷忽申猛安完顏仲元加光祿大夫
升右監軍特授河北東路洮安必刺猛安各賜金鑿帶有
差三月甲辰朔宋人襲汝陽壬子誠諭平章英王守純宗
欽癸丑以河中府推官籍阿外權元帥右都監總領侯小
叔軍甲寅上謂宰臣人有才堪任事其心不正者終不足
貴丞相汝礪對曰其心不正而濟之以才所謂虎而翼者
也雖古聖人亦未易知上以為然丙辰長春節免朝以戶

部尚書石盞畏忻為參知政事兼修國史辛酉禁茶壬戌
詔以鳳翔戰功及頒賞等級徧諭諸郡甲子以完顏伯嘉
權參知政事行尚書省于河中府辛未詔職官犯罪非死
罪除名遇赦幸免有才幹者中外並用夏四月癸酉朔復
霍州汾西縣詔給空名宣勅遷賞將士之有功者丙子設
京兆南山安撫司丁丑故鳳翔萬戶完顏醜和以死節贈
懷遠大將軍授刺史職其父恕除以功例賞外遷兩官升
職二等己卯遣官閱河南帥府見兵籍閑官豪右親丁及
遼東河北客戶為軍庚子募西山獵戶為軍五月癸卯朔
始造元光重寶丙午復河中府及榮州遣人持檄招前恒

山公武仙乙卯權平陽公史詠復霍州及洪洞縣丁巳始
造元光珍貨同銀行用戊午以檄招東平嚴實己未參知
政事毅夫言脅從人號忠孝軍而置公准者所為多不法
請防閑之上曰人心無常顧馭之何如爾馭之有術遠方
猶且聽命况此輩乎不然雖左右亦難防閑正在廓開大
度而已若是而不能致太平者命也庚申簽河南路寄居
官民充軍辛酉徙晉陽公郭文振兵于孟州甲子徙權平
陽公史詠兵于解州河中府六月乙亥京東總帥報淮南
之捷丁亥罷行省所置監察御史兼彈壓之職戊子議遣
人招李全嚴實張林甲午詔罷河中行省置元帥府辛丑

遙授靜難軍節度使顏盩蝦蟆等以保鳳翔功進官秋七月壬寅朔夏人犯積石州羗界寺族多陷沒惟桑逋寺僧看逋昭逋斯沒及答那寺僧奔鞠等拒而不從詔賞諸僧鈐轄正將等官而給以廩祿乙巳遣兵守衛解州鹽池庚戌以空名宣勅遷賞諸部降人壬子除市易用銀及銀與寶泉私相易之禁癸丑勅諸御史曰瑣細事非人主所宜詰然凡涉姦弊靡不有關國政者比聞朝官及承應人月給俸糧多雜糠土有司所收曷嘗有是物哉至于出納斗斛亦小大不一此皆理所不容者而臺官初不問事事類朕言之安用汝曹也乙卯州鳳門壞丁巳陰坡族之骨鞠

門等叛歸夏元帥夾谷瑛發兵討之以捷聞御史中丞師安石言制敵二事戊午宰臣方對次有司奏前奉御溫敦太平卒上大駭曰朕屢欲授太平一職每以事阻今僅授之未數日而亡豈非天邪因謂宰臣曰海陵時有護衛二人私語一曰富貴在天一曰由君所賜海陵竊聞之詔授言由君所賜者以五品職意謂誠由己也而其人以疾竟不及授章宗秋還聞平章張萬公薨歎曰朕迴將拜萬公丞相而遂不起命也乙丑詔籍陝西路僑居官民為軍八月辛未朔邳州從宜經略使納合六哥等率都統金山顏俊以沂州百餘人晨入省署殺行尚書省蒙古綱據州反

壬申詔賞京兆路官軍保全南山諸谷之功以所全人數
多寡爲等第千人以上官一階三千人以上兩階五千人
以上三階仍升職一等能以力戰護之者又增一階戰沒
者就以贈之甲戌遣官持空名宣敕諭以重賞招納合六
哥拒命即命牙吾塔合行院兵討滅之乙亥火星入鬼宿
中掩積戶氣乙酉詔能捕獲反賊六哥者除見定官外仍
與世襲謀克丙戌遣官分行蔡州陳亳唐鄧裕諸州洎司
農司州縣吏同議凡民丁相聚立砦避兵與各巡檢軍相
依者五千戶以上置砦若長一負百戶增副一負仍先遷一
官能安民弭盜勸農者論功注授九月庚子朔日有食之

宋人入壽州女奚烈蒲乃力戰却之壬寅樞密院奏提控
木甲剽只罕破宋人之功甲辰宋人攻南陽丙午牙吾塔
報桃園淮陽之捷并以納合六斤結構李全之狀來告戊
申降人孫邦佐自李全軍中歸遙授知東平府兼山東西
路兵馬都總管官軍與宋人力戰于胡陂而却之提控木
虎春兒爲所殺癸丑納合六哥所署僞都統烏古論養漢
夾谷留住等來歸己未贈木虎春兒銀青榮祿大夫丙寅
扎也胡魯等拔邳州南城丁卯權御史中丞師安石等劾
英王守純不實付有司鞠治尋詔免罪而猶責諭之冬十
月癸酉徙晉陽公郭文振等兵于衛州乙亥制行樞密院

及元帥府農隙之月分番巡徼校獵月不過三次丁丑上
獵于近郊己卯裕于太廟壬午火星犯靈臺乙酉上獵于
近郊辛卯詔石壕店沔池永寧縣各屯兵千人壬辰滕州
人時明謀反伏誅戊戌唐鄧行元帥報淮南之捷十一月
己亥紅襖賊偽監軍徐福等來降詔進牙吾塔官一階賜
金幣有差辛丑總帥牙吾塔報邳州之捷函叛人六哥首
以獻開封縣境有虎噬人詔親軍百人射殺之賞射獲者
銀二十兩而以內府藥賜傷者丙午邳州紅襖賊二千來
降初擬置諸陳許之間上以爲若輩雖降家屬尚在河朔
餘黨必殺之所得者寡而被害者衆亦復安忍不若命使

撫諭加以官賞而遣之還果忠於我雖處河朔豈有戎邪
且餘衆感恩將有效順者矣戊午以上黨公完顏開之請
諭開及郭文振史詠王遇張道盧步等各與所鄰帥府相
視可耕土田及瀕河北岸之地分界而種之以給軍餉辛
酉鞏州行元帥府報會州破夏人之捷十二月己巳朔徙
公淮巡檢邊軍于內地癸酉以空名宣命金銀符給完顏
開當功辛巳詔延安土人充司縣官義軍使者選人代之
量免其民差稅邳州民丁死戰陣者各贈官一階歸德徐
邳宿泗永亳穎壽等州復業及新地民免差稅二年見戶
二年嘗供給邳州者復免一年之半睢州陳留杞縣免三

之一丁亥上不豫免朝戊子皇太子率百官及王妃公主
入問起居己丑復入問起居庚寅上崩于寧德殿壽六十
有一上疾大漸暮夜近臣皆出惟前朝資明夫人鄭氏年
老侍側上知其可託詔之曰速召皇太子主後事言絕而
崩夫人心之是夜皇后及貴妃龐氏問安寢閣龐氏陰校
機慧常以其子守純年長不得立心鞅鞅夫人恐其為變
即紿之曰上方更衣后妃可少休他室伺其入遽鑰之急
召大臣傳遺詔立皇太子始啓戶出后妃發喪皇太子方
入宮英王守純已先入皇太子知之必遣樞密院官及東
宮親衛軍官移刺浦阿集軍三萬餘于東華門街部署既
定命護衛四人監守純於近侍局乃即皇帝位於柩前壬
辰宣遺詔是日詔赦中外明年正月戊戌朔改元正大謚
大行曰繼天興統述道勤仁英武聖孝皇帝廟號宣宗三
月庚申葬德陵

贊曰宣宗當金源末運雖乏撥亂反正之材而有勵精圖
治之志迹其勤政憂民中興之業蓋可期也然而卒無成
功者何哉良由性本猜忌崇信誓御獎用吏胥苛刻成風
舉措失當故也執中元惡此豈可相者乎顧乃懷其援立
之私自除廉陞之分悖禮甚矣高琪之誅執中雖云除惡
律以春秋之法豈逃趙鞅晉陽之責既不能罪而遂相之

失之又失者也遷汴之後北顧有道之朝日益隆盛智識之士孰不先知方且狃於餘威牽制群議南開宋衅西啓夏侮兵力旣分功不補患曾未數年昔也日闢國百里今也日蹙國百里其能濟乎再遷遂至失國豈不重可歎哉

本紀第十七

金史十七

元開府儀同三司上柱國前中書右丞相監修國史

都總裁臣脫脫修

哀宗上

哀宗諱守緒初諱守禮又諱寧申速宣宗第三子母曰明惠皇后王氏賜姓溫敦氏仁聖皇后之女兒也承安三年八月二十三日生於翼邸仁聖無子養爲己子泰和中授金紫光祿大夫宣宗登極進封遂王授祕書監改樞密使貞祐初莊獻太子守忠薨立皇孫鏗爲皇太孫尋又薨四年正月己卯立守禮爲皇太子仍控制樞密院事詔略曰

子以母貴遂王守禮地鄰家嫡慶集元妃立爲皇太子其
典禮有司條具以聞四月甲午用太子少保張行信言更
賜名守緒元光二年十二月庚寅宣宗崩辛卯奉遺詔即
皇帝位于柩前壬辰詔大赦略曰朕述先帝之遺意有便
於時欲行而未及者悉奉而行之國家已有定制有司徃
徃以情破法使人罔遭刑憲今後有本條而不遵者以故
入人罪罪之草澤士庶許以直言軍國利害雖涉譏諷無
可采取者並不坐罪

正大元年春正月戊戌朔詔改元正大庚子上居廬宮
始奏事祕書監權吏部侍郎蒲察合住改恒州刺史左司

員外郎泥庵古華山同知楨州軍州事遂二姦臣大夫士
相賀邠州節度使移刺木納阿卜貢白兔詔曰得賢臣輔
佐年穀豐登此上瑞也焉事此爲令有司給道里費縱之
本土禮部其徧諭四方使知朕意丁巳詔朝臣議脩復河
中府禮部尚書趙秉文太常卿楊雲翼等言陝西民方疲
敝未堪力役遂止戊午上始視朝大司農守汝州防禦使
李蹊爲太常卿權參知政事平章政事荆王守純罷判睦
親府參知政事僕散五斤罷充大行山陵使尊皇后溫敦
氏元妃溫敦氏皆爲皇太后號其宮一曰仁聖一曰慈聖
百官入賀于隆德殿是日大風飄端門瓦赤盞合喜權樞

密副使有男子服麻衣望承天門且笑且哭詰之則曰吾
笑笑將相無人吾哭哭金國將亡群臣請寬重典上持不
可曰近詔草澤諸人直言雖涉譏訕不坐法司唯以君門
非笑哭之所重杖而遣之南陽民布陳謀反伏誅三月癸
惑犯左執法戊申奉安宣宗御容于孝嚴寺辛亥丞相高
汝礪薨癸丑葬宣宗于德陵甲寅起復邠州節度使致仕
張行信爲尚書左丞以延安帥臣完顏合達戰禦有功授
金虎符權叅知政事行尚書省事于京兆兼統河東兩路
夏四月癸酉宣宗祔廟大赦中外癸惑犯右執法五月戊
戌平章政事把胡魯薨癸卯樞密副使完顏賽不爲平章

權叅知政事石盞尉忻燕尚書右丞太常卿李蹊爲
翰林承旨仍權叅政甲辰賜策論進士李未論長河以下
十餘人及第經義進士張介以下五人及第戊申賜詞賦
進士王鷄以下五十人及第詔刑部登聞檢鼓院毋鎖閉
防護聽有冤者陳訴六月甲戌宰執請擊鞠上以心喪不
許辛卯之妃徒單氏爲皇后遣樞密判官移剌蒲阿率兵
至光州榜諭宋界軍民更不南伐秋七月己亥詔諭百官
各勤乃職癸卯補脩大樂九月樞密判官移剌蒲阿復澤
潞獲馬千疋冬十月戊午夏國遣使來脩好十二月乙巳
柘州刺史蒲察合住有罪伏誅甲寅宣宗小祥燒飯于德

陵改定辟舉縣令法以六事課縣令京東西南陝西設大
司農司兼採訪公事京師大司農總之左丞張行信言先
帝詔國內刑不上大夫治以廉恥丞相高瑛所定職官犯
罪的決百餘條乞改依舊制上欲彰先帝之過略施行之
二年春正月甲申有黃黑之侵夏四月辛卯朔恒山公武
仙自真定府來奔起復平章政事致仕莘國公香鼎為平
章政事行省事于衛州進封英國公甲午以京畿旱遣使
慮囚鈞許州大雨雹丁酉宿鄭州雨傷麥五月丁丑以旱
甚責已避正殿減常膳赦罪蘇椿自大名來奔詔置椿許
州秋七月都水蒲察毛花蠶奴八免死除名八月鞏州元

國田端反行省軍圍之其毋知十哥殺瑞出降赦其罪以
為州節度使世襲猛安九日其國和議定以兄事金各
用本國年號遣使來聘奉國書稱弟之十月以夏國脩好
詔中外新軍政改總領為都尉己酉以誅田端詔中外矣
亥遣禮部尚書奧敦良弼大理卿裴滿欽甫侍御史烏古
孫弘毅為夏國報成使國書稱兄乙亥面諭臺諫完顏素
闡陳規曰宋人輕犯邊界我以輕騎襲之冀其懲創通好
以息吾民爾夏人從來臣屬我朝今稱帝以和我尚不以
為辱果得和好以安吾民尚欲用兵乎卿等宜悉朕意移
刺蒲阿及宋人戰于光州獲馬數千殺人千餘而還內族

王家奴故殺鮮于主簿權貴多救之者上曰英王朕兄敢
妄撻一人乎朕為人主敢以無罪害一人乎國家衰弱之
際生靈有幾何而族子恃勢殺一主簿吾民無主矣特命
斬之詔有司爲死節士十有三人立葉忠廟禁宿泗青口
巡邊官兵毋復擅殺過淮紅衲軍詔趙秉文楊雲翼作龜
鏡萬年錄

三年春正月丁巳朔夏國遣使來賀三月陝西旱平章政
事胥鼎復請致仕不許詔尚書省議省減用度夏四月辛
卯親享于太廟邸國夫人車經御路過廟前馭者乘馬二
婢坐車中俱不下詔繫獄杖之辛丑以旱遣官禱于濟瀆

癸卯祈于太廟禁織扇河南大雨雹己酉遣使慮囚遣使
捕蝗五月己未大雨宋兵掠壽州境癸亥宋州桃園軍失
利死者四百人乙丑大雨壬申詔諭陝州趙南等能以土
地來歸當任使之六月辛卯京東大雨雹蝗盡死壬子詔
諭高麗及遼東行省葛不雷討反賊萬家奴赦脅從者秋
七月庚午平章政事英國公胥鼎薨八月移刺蒲阿復曲
沃及晉安辛卯詔設益政院于內廷以禮部尚書楊雲翼
等爲益政院說書官日二人直備顧問冬十月丁酉夏使
來報哀十一月庚申議與宋修好戊辰又議之己巳宋忠
義軍夏全自楚州來歸楚州王義深張惠范成進以城降

封四人爲郡王辛未改楚州爲平淮府以夏全等來降赦
諸路從宋及淮楚官吏軍民并其家屬甲戌遣使夏國賀
正旦丙子夏以兵事方殷來報各停使聘大元兵征西夏
平中興府召陝西行省及陝州總帥完顏訛可靈寶總帥
紇石烈牙吾塔赴汴議兵事詔諭陝西兩省凡戎事三品
以下官聽以功過賞罰之銀二十五萬兩從其給賞遣中
大夫完顏履信爲弔祭夏國使

四年春正月辛亥朔壬戌增築中京城浚汴城外濠二月
蒲阿牙吾塔復平陽執知府李七斤獲馬八千三月簽勞
效官充軍有怨言不果用以銀贖平陽虜獲男女分賜官

軍者聽自便大元兵平德順府節度使愛申攝府判馬肩
龍死之大元兵復下平陽己巳徵夏稅二倍夏五月丁丑
議乞和于大元大元兵平臨洮府總管陲蒲胡士門死之
陝西行省進三策上策自將出戰中策幸陝州下策棄秦
保潼關不從六月戊申朔遣前御史大夫完顏合周爲議
和使丙辰地震太白入并賜詞賦經義盧亞以下進士第
秋七月大元兵自鳳翔徇京兆關中大震工部尚書師安
石爲尚書右丞壬辰以中丞烏古孫卜吉祭酒裴滿阿虎
帶兼司農卿簽民軍勸率富民入保城聚羨督秋稅令百
姓知避遷之計丁酉赦陝西東西兩路賜民今年租八月

唐成詔有司罷遣防備丁壯修城民夫軍須差發應不急
者權停已巳萬年節同知集賢院史公奕進之定遺訓待
制呂造進尚書要略是日大風落左掖門鷓尾壞丹鳳門
扉隕霜禾盡損李全自益都復入楚州據之遣總帥完顏
訛可元帥慶山奴守盱眙與全戰于龜山敗績冬十月辛
酉右拾遺李大節右司諫陳規劾同判睦親府事撒合董
姦賊不報壬戌外臺監察御史諫獵上怒以邀名責直責
之詔贈德順府死事愛申馬肩龍等官以淮南王爵招李
全十一月乙未未時日上有二白虹貫之丁酉獵于近郊
十二月真授李蹊叅知政事大元兵下商州壬子遣使安

撫陝西以牛千頭賜貧民

五年春正月丁丑親祭三廟庚辰遣知開封府事完顏麻
斤出如大元弔慰丙戌議擊盱眙辛卯以龜山之敗降元
帥慶山奴為定國軍即度使二月乙巳朔大寒雷雨雪木
之華者盡死癸丑詔有司以臨洮總管陞蒲胡土門塑像
入褒忠廟書死節子孫于御屏量材官使之三月甲戌朔
群臣請依祖宗故事樞密院聽尚書省節制不從乙酉監
察御史烏古論不魯刺劾近侍張文壽張仁壽李麟之受
饋遺曲赦其罪而出之夏四月甲辰朔以御史言三姦不
已凡四日不視朝公曰議放還西夏人口丙寅右丞師安

石薨親衛軍王咬兒酗酒殺其孫大理寺當以徒刑特命
斬之五月癸巳定國軍節度使慶山奴以受賂奪一官六
月壬戌以旱赦雜犯死罪已下秋七月戊子同判睦親府
事撤合輦出為中京留守行樞密院事八月乙卯以旱遣
使禱于上清宮甲子叅知政事白撒為尚書石丞太常卿
顏蓋世魯權叅知政事增築歸德行樞密院擬工役數百
萬詔遣權樞密院判官白華喻以農夫勞苦減其工三之
二以節制不一併衛州帥府於恒山公府命白華往經畫
之九月庚寅雨足始種麥冬十一月辛巳進宣宗實錄十
二月庚子朔日有食之完顏麻斤出以奉使不職免死除

名壬子完顏訥申改侍講學士充國信使以陝西大寒賜
軍士柴炭銀有差京兆鳳翔府司竹監進竹令分給之
六年春二月丙辰樞密院判官移刺蒲阿權樞密副使耀
州刺史李興有戰功詔賜玉兔鶻帶金器以丞相完顏賽
不行尚書省事于關中召平章政事完顏合達還朝移刺
蒲阿率忠孝軍總領完顏陳和尚忠孝軍一千騎駐邠州
遣白華馳喻蒲阿以用兵之意詔樞密更給忠孝軍馬疋
以漸調發都尉司步卒及忠孝馬軍屯京西以白華專備
軍須三月乙亥忠孝軍總領陳和尚有戰功授定遠大將
軍平涼府判官世襲謀克夏五月隴州防禦使后抹冬兒

進黃鸚鵡詔曰外方獻珍禽異獸違物性損人力令勿復
進秋七月罷陝西行自軍中浮費八月移刺蒲阿再復澤
潞九月洮河蘭會元帥顏彥瑁進西馬二疋詔曰卿武
藝超絕此馬可充戰用朕乘此豈能盡其力既入進即尚
廐物也今以賜卿其恣朕意冬十月移刺蒲阿東還令陳
和尚率陝西歸順馬軍屯鈞許大元兵駐慶陽界詔陝西
行省遣使奉羊酒幣帛乞緩師請和十一月遣使鈞許選
試陝西歸順人得軍二千以藝優者充忠孝軍次充合里
合軍十二月詔副樞浦阿總帥紇石烈牙吾塔權簽樞密
院事完顏訛可救慶陽罷附京獵地百里聽民耕稼

七年春正月副樞蒲阿總帥牙吾塔權簽樞密院事訛可解慶
陽之圍以訛可屯邠州蒲阿牙吾塔還京兆夏五月詔釋
清口宋敗軍三千人願留者五百人以屯許州餘悉縱遣
之賜經義詞賦李瑋以下進士第秋七月以平章政事合
達權樞密副使八月賜陝西死事之孤鹽引及絹仍量材
任使大元兵圍武仙于舊衛州冬十月平章合達副樞蒲
阿引兵救衛州衛州圍解上登承天門犒軍合達蒲阿並
世襲謀克移刺蒲阿權叅知政事同合達行省事于閩鄉
以備潼關八年春正月大元兵圍鳳翔府遣樞密院判官
白華右司郎中夾谷八里門諭閩鄉行省進兵合達蒲阿

以未見機會不行復遣白華諭合達蒲阿將兵出關以解
鳳翔之圍又不行夏四月丁巳朔赦全免京西路軍需錢
一年旱災州縣差稅從實減貸大元兵平鳳翔府兩行省
棄京兆遷居民於河南留慶山奴守之五月李全妻楊妙
貞以全陷沒于宋構浮梁楚州北欲復宋讎遣合達蒲阿
屯桃源界敖河口以備侵軼宋八里莊人拒其主將納合
達蒲阿詔改八里莊爲鎮淮府秋七月宋將樊浮梁九月
丙申慈聖宮皇太后温敦氏崩遣誥園陵制度務從儉約
大元兵駐河中府慶山奴棄京兆東還召合達蒲阿赴汴
議引兵趨河中府懼不敢行還陝州出師主冷水谷而歸

大元兵攻河中府合達蒲阿遣元帥王敢率兵萬人救之
冬十月右丞相賽不致仕十一月丁未大元進兵峽峯關
由金州而樞密院議以逸待勞未可與戰上諭之曰南渡
二十年所在之民破田宅鬻妻子竭肝腦以養軍今兵至
不能逆戰止以自護京城縱存何以爲國天下其謂我何
朕思之孰矣存與亡有天命惟不負吾民可也乃詔諸將
屯軍襄鄧十二月己未葬明惠皇后河中府破權簽樞密
院事草火訛可死之元帥板子訛可提敗卒三千走閬鄉
詔赦將佐以下杖訛可二百以死合達蒲阿率諸軍入鄧
州楊沃衍陳和尚武仙皆引兵來會出屯順陽戊辰大元

兵渡漢江而北丙子畢渡合達蒲阿將兵禦于禹山之前
大元兵分道趨汴京京師戒嚴是夜二鼓合達蒲阿引軍
還鄧州大元兵躡其後盡獲其輜重

天興元年

是年本正大九年正月改元開興四月又改元天興

春正月壬午朔日有

兩珥大元兵道唐州元帥完顏兩婁室與戰襄城之汝墳
敗績兩婁室走汴京遣完顏麻斤出等部民丁萬人決河
水衛京城癸未置尚書省樞密院于宮中以便召問起前
元帥古里甲石倫權呂武軍節度使行元帥府事合達蒲
阿引軍自鄧州赴汴京乙酉以點檢夾谷撒合為總帥將
步騎三萬巡河渡權近侍局使徒單長樂監其軍起近京

諸邑軍家屬五十萬口入京丙戌大元兵既定河中由河
清縣白坡渡河丁亥長樂撒合引兵至封丘而還戊子左
司郎中斜卯愛實上書請斬長樂撒合以肅軍政不從都
尉烏林荅胡土一軍自潼關入援至偃師聞大元兵渡河
遂走登封少室山壬辰衛州節度使完顏斜捨阿不棄城
走汴甲午修京城樓櫓及守禦備大元兵薄鄭州與白坡
兵合屯軍元帥馬伯堅以城降防禦使烏林荅咬住死之
乙未大元游騎至汴城丁酉大雪大元兵及兩省軍戰鈞
州之三峯山兩省軍大清合達陳和尚楊沃衍走鈞州城
破皆死之樞密副使蒲阿就執尋亦死武仙走密縣自是

兵不復振巳亥徐州行省完顏慶山奴引兵入援義勝軍
校侯進杜正張興率所部北降慶山奴入睢州庚子御端
門肆赦改元開興辛丑潼關守將李平以關降大元壬寅
扶溝民錢大亨李鈞叛殺縣令王浩及其簿尉庚戌許州
軍變殺元帥古里甲石倫粘合全周蘇椿等以城降大元
二月壬子朔慶山奴謀走歸德至陽驛店遇大元兵徐帥
完顏兀里力戰而死慶山奴被擒使招京城不從睢州刺
史張文壽棄城從慶山奴皆死之甲寅大元兵徇臨渙攝
縣令張若愚死之戊午次盧氏關陝行省總帥兩軍及秦
藍帥府軍乘潼關而東與之遇天又大雪未戰而潰行省

徒單兀典總帥納合合閏敗死完顏重喜降斬于馬前都
尉鄭個殺都尉苗英亦降秦藍總帥府經歷商衡死之大
元兵下睢州庚申翰林待制馮延登使北來歸乙丑大元
兵攻歸德庚午起復右丞相致仕賽不為左丞相括京師
民軍二十萬分隸諸帥人月給粟一石有五斗三月丁亥
大元軍平中京留守撒合輦投水死甲午命平章政事白
撒宿上清宮樞密副使合喜宿大佛寺以備緩急大元遣
使自鄭州來諭降使者立出國書以授譯史譯史以授宰
相宰相跪進上起立受之以付有司書索翰林學士趙秉
文衍聖公孔元措等二十七家及歸順人家屬蒲阿妻子

繡女弓匠鷹人又數十人庚子封荆王子訛可爲曹王議
以爲晉密國公壽以曹王幼請代行上慰遣之不聽其代
壬寅尚書左丞李蹊送曹王出質諫議大夫裴滿阿虎帶
太府監國世榮爲講和使戶部侍郎楊愷權叅知政事分
軍防守四城大元兵攻汴城上出承天門撫西面將士千
戶劉壽語不遜詔釋勿問癸卯上復出撫東面將士親傳
戰傷者藥于南薰門下仍賜卮酒出內府金帛器皿以賞
戰士乙巳鳳翔府砲軍萬戶王阿驢樊喬來歸己酉造革
軍三千兩已而不用置局養無家俘民夏四月癸丑兵士
李新有功擢四方館使元帥劉益比其子戰死丁巳遣

部侍郎楊仁奉金帛詣大元兵乞和戊午又以珍異往謝
許和癸亥明惠皇后陵被發失柩所在遣中官往視之至
是始得以兵護宮女十人出迎朔門奉柩至城下設御幄
安置是夜復葬之戮鄭侗妻子甲子御端門肆赦改元天
興詔內外官民能完復州郡者功賞有差出金帛酒炙犒
飫軍士減御膳罷冗官放宮女上書不得稱聖改聖旨爲
制旨釋錮厲王衛紹王二族禁錮聽自便乙丑百官初起
居于隆德殿前丙寅以尚書省兼樞密院事丁卯放宮女
聽以衣裝自隨金珠留犒士卒汴京解嚴步軍始出封丘
門采薪蔬己巳建威都尉完顏兀論同大元使沒忒入城

庚午見使臣於隆德殿放宮女如前辛未開鄭門聽百姓
男子出入甲戌御承天門大饗將士聞有聲屈者乃還宮
乙亥有詔止奏事許州進櫻桃五月辛巳遷民告出城者
以萬數蹇不自撒不聽乙酉以商陽郡王子思烈行尚書
省于鄧州召援兵丙戌拜天於大慶殿詔白撒致仕放京
城四面軍李辛不奉詔丁亥鑿洧川漕渠尋罷之馮延登
以奉使有勞授禮部侍郎戊子裕州鎮防軍將領賀都喜
率西軍二千人入援放遷民出京辛卯大寒如冬密國公
瑋薨汴京大疫凡五十日諸門出死者九十餘萬人貧不
能葬者不在是數癸巳楊春入據亳州觀察判官劉均死

之辛丑上御香閣面責宰相乙丑將相受保城爵賞六月
庚戌朔詔百官舉大將衆舉劉益不能用癸丑飛虎軍二
百人奪封丘門出奔甲寅以出師錮門禁乙卯白撒開渠
於私第東丙辰閔官馬擇瘠者殺以食丁巳封仙據徐州
徒單益都走宿州推張興行有事庚申塞京城四門以便
守禦壬戌國用安入徐州殺張興推封仙爲元帥以主州
事己巳詔贈御侮中郎將完顏陳和尚鎮南軍節度使立
保忠廟碑權叅知政事楊皓罷辛未復修汴城以疫後園
戶僧道醫師粥棺者擅厚利命有司倍征之以助其用甲
戌宿州鎮防千戶高臘哥李宣殺節度使紇石烈阿虎父

子請行省徒單益都主帥事益都不從率其將吏西走至
穀熟遇大元軍死之乙亥左丞李蹊送曹王與其子全俱
還丁丑恒山公武仙殺士人李汾七月庚辰朔兵刃有大
辛巳軍士搗登聞鼓乞將劉益癸未尚書右丞顏盩世魯
罷吏部尚書完顏奴申爲叅知政事申申飛虎軍事申福
蔡元擅殺北使唐慶等三十餘人于館詔首其罪和議遂
絕乙酉都人揚言欲殺白撒密詔遣衛士護其家丙戌軍
士毀白撒別墅斜捻阿不妄殺市人之過其門者以靖亂
丁亥拜天于承天門下出內府及兩宮物賜軍士戊子下
令招軍辛卯簽民爲兵鞏昌民百二十人赴援乙未宿州

帥衆僧奴稱國安用降遣近侍直長因世英等持詔封安
用爲充王行京東等路尚書省事賜姓完顏改名用安新
軍有搗登聞鼓者杖殺之乙巳金木火太陰會于軫翼丙
午叅知政事完顏思烈恒山公武仙鞏昌總帥完顏忽斜
虎率諸將兵自汝州入援以合喜爲樞密使將兵一萬應
之命左丞李蹊勸諭出師乃行八月己酉朔合喜屯杏花
營又益兵五十人始進屯中牟故城庚戌發丁壯五千人
運糧餉合喜軍辛亥虎顏思烈遇大元兵于京水遂潰武
仙退保留山思烈走御寨中京元帥左監軍壬子任守貞
死之合喜棄輜重奔至鄭門聚兵乃入甲寅免合喜爲庶

人籍其家以賜軍士降監軍長樂為符寶郎丁巳釋真孔
子戊午括民間粟已未籍徒單兀典完顏重喜納合合閏
家皆前儀封令魏璠上言璽昌帥完顏仲德沉毅有遠謀
臣請奉命往召不報戊辰免府試起復前大司農侯摯為
平章政事進封蕭國公行京都路尚書省事己巳摯帥兵
行至封丘將士將潰摯止之乃與衆還汴壬申聽無軍家
口戊京甲戌金木星交乙亥摯官及許冒進士第丙子詔
罷括粟復以進獻取之丁丑京城民楊興入貨授延州刺
史戊寅劉仲溫入貨授許州刺史

本紀第十七

本紀第十八

金史十八

元開府儀同三司上柱國前中書右丞相監修國史
都總裁臣脫脫修

哀宗下

九月戊寅朔詔減親衛軍已丑軍士殺鄭門守者出之庚
辰起上黨公張開及臨淄郡王王義深廣平郡王范成爲
元帥以前御史大夫完顏合周權叅知政事乙未以勝召
民賣放下年軍需錢上戶田租如之辛丑夜大雷工部尚
書范乃速震死閏月戊申朔遣使以鐵券一虎符六大信
牌十織金龍文御衣賜越王玉魚帶一弓矢二賜完王周

安其父母妻皆贈封之又以世襲宣命十郡王宣命十五
兔鶻帶十付用安其同盟可賜者即賜之辛亥遣張開溫
撒辛劉益高顯率步軍護陳留通許糧道罷貧民進獻糧
戊午招鄉導已未有箭射入宮中書姦臣姓名兩日而再
得之辛酉再括京城粟以御史大夫合周點檢徒單白家
等主之丙寅括粟使者兵馬都總領完顏九住以粟有蓬
稗杖殺孝婦于省門十月以前司農卿李煥飛語詔左丞
李蹊戶部侍郎楊慥繫獄將以軍儲失計坐罪俄蹊慥並
除名而止籍慥家貲煥遂權戶部尚書尋赦死欠糧其應
以糧事繫者皆釋之詔徵諸道軍期以十二月一日入援

十一月丁未朔賜貧民粥平章以事侯摯致仕左司郎中
斜卯愛實以言事忤近侍送有司尋釋之己酉衛州軍校
白書取豐備倉米壬子京城人相食癸丑詔省門宋門放
士民出就食壬戌召諸將相入議事充王用安率兵至徐
州元帥王德全閉城不納會劉安國與宿帥衆僧奴引兵
入援至臨渙用安使人劫殺之攻徐州久不能下退保漣
水制使囚世英以用安不赴援還至宿州西遇大元兵死
之丙寅河解元帥權興寶軍節度使趙偉襲據陝州以叛
殺行省阿不罕奴十刺以下凡二十一人誣阿不罕奴十
刺等反狀以聞上知其寃不能直其事就授偉元帥左監

軍兼西安軍節度使行總帥府事偉尋亦歸北十二月丙子朔以事勢危急遣近侍即白華問計華對以紀季以鄭入齊之義遂以爲右司郎中甲申詔議親出乙酉再議於大慶殿上欲以官奴高顯劉益爲元帥不果是日除拜扈從及留守京城官以右丞相樞密使兼左副元帥賽不平章政事權樞密使兼右副元帥白撒右副元帥兼樞密副使權叅知政事訛出兵部尚書權尚書左丞李蹊元帥左監軍行總帥府事徒單百家等率諸軍扈從叅知政事兼樞密院副使完顏奴申樞密副使兼知開封府權叅知政事督糧阿不裏城四面都總領戶部尚書完顏珠顆外城

東面元帥把世合南面元帥木甲咬住西面元帥崔立北面元帥孛術魯實奴等留守除拜既定以京城付之擢魏璠爲翰林修撰如鄧州招武仙入援丁亥上御端門發府庫及兩府器皿宮人衣服賜將士戊戌官奴阿里合謀立荆王不果朝廷知其謀置不問庚子上發南京與太后皇后諸妃別大慟行次公主苑太后遣中官持米肉徧犒軍士辛丑至開陽門外麾百官退詔諭戍兵曰社稷宗廟在此汝等壯士也毋以不預進發之數便謂無功若保守無虞將來功賞顧豈在戰士下聞者皆灑泣是日鞏昌元帥完顏忽斜虎至自金昌爲上言京西二百里之間無井甃

不可往東行之議遂決以爲尚書右丞從行遂次陳留壬寅次杞縣癸卯次黃城丞相完顏審子之子按春有罪伏誅甲辰次黃陵癸巳諸將請幸河朔從之

二年正月丙午朔濟河北風大作後軍不克濟丁未大元兵追擊于南岸元帥完顏猪兒賀都喜死之建威都尉完顏兀論出降丁酉上哭祭戰死士于河北岸皆贈官斬兀論出二弟以殉赦河朔招集兵糧議取衛州元帥蒲察官奴將忠孝軍千人東面元帥高顯果毅都尉粘哥咬住領軍萬人爲前鋒至蒲城庚戌上次溫麻岡平章政事白撒元帥和速嘉兀底不繼至辛亥白撒引兵攻衛州不克乙

卯聞大元兵自河南渡河至衛之西南遂退師丁巳戰于白公廟白撒敗績棄軍東遁元帥劉益上黨公張開亦遁並爲民家所殺益部曲王全降戊午上進次蒲城復還魏樓村李辛自汴京出奔伏誅己未上以白撒謀夜棄六軍渡河與副元帥合里合六七人走歸德庚申諸軍始知上已往遂潰辛酉司農大卿蒲察世達元帥完顏忽土出歸德西門奉迎上入歸德赦在府囚軍民普覃一官賜進士終場王輔以下十六人出身遣奉御木甲塔失不后弟徒單四喜往汴京奉迎兩宮白撒還自蒲城聚兵于大橋不敢入壬戌遣使召白撒至數其罪下之獄仍籍其家財以

賜將士曰汝輩宜竭忠力毋如斯人誤國人予金一兩七日白撒及其子忽土鄰皆死獄中右丞相賽不致仕右丞完顏忽斜虎行省事于徐州官奴再請率兵北渡女魯權不可遣歸德知府行戶部尚書蒲察世達都轉運使張俊民如陳蔡取糧以元帥李琦王壁護之戊辰安平都尉京城西面元帥崔立與其黨韓鐸藥安國等舉兵為亂殺叅知政事完顏奴申樞密副使完顏斜捨阿不勒兵入見太后傳令立衛王子從悅為梁王監國即白為太師馬軍都元帥尚書令昇白稱左丞相都元帥尚書令鄭王弟倚平章政事侃殿前都點檢其黨李木魯長河御史中丞韓鐸

副元帥兼知開封府折希顏藥安國張軍奴完顏合魯並元帥師肅左右司郎中賈良兵部郎中兼右司都事又署工部尚書溫迪罕二十吏部侍郎劉仲周並為叅知政事宣徽使奧屯舜卿為尚書左丞戶部侍郎張正倫為尚書右丞左右司都事張節為左右司郎中尚書省椽元好問為左右司員外郎都轉運知事王天祺懷州同知康瑋並為左右司都事開封判官李禹翼棄官去戶部主事鄭著召不起是日右副點檢溫敦阿里左右司員外郎聶天驥御史大夫裴蒲阿虎帶諫議大夫左右司郎中烏古孫奴申左副點檢完顏阿散奉御忙哥講議蒲察琦並死之遂

送款大元軍前癸酉大元將碎不斛進兵汴京甲戌立閣
隨駕官屬軍民子女於省署及禁民間嫁娶括京城財兩
宮值變不果行吞失不以其父咬住四喜以其妻奪門而
出庚午至歸德上怒二人皆斬於市乙亥遣右官徽提點
近侍局事移刺粘古如徐州相地形察倉庫虛實白華如
鄧州召兵二月丙子朔魚山張獻殺元帥完顏忽土行省
忽斜虎自率兵討之會從官嚴祿誅斲乃還括城中糧知
歸德府事石盞女魯懽爲樞密副使權參知政事留元帥
官奴忠孝軍四百五十人都尉馬用軍二百八十餘人癸
餘軍赴宿徐陳三州就糧三月乙丑石盞女魯懽乞盡

衛兵出城就食官奴私與國用安謀邀上幸海州不從蔡
帥烏古論鎬以糧四百餘斛至歸德表請臨幸上遣學士
烏古論蒲鮮以幸祭之意諭其州人戊辰官奴以忠孝寧
爲亂攻殺馬用遂殺尚書左丞李蹊參知政事石盞女魯
懽點檢徒單長樂從官右丞已下三百餘人上赦官奴暴
女魯懽罪狀以官奴爲樞密副使權參知政事左右司郎
中張天綱爲戶部侍郎權參知政事辛巳官奴自授參知
政事兼左副元帥官奴以上居照碧堂禁諸臣無一人敢
奏對者上日悲泣言曰自古無不亡之國不死之主但恨
朕不知用人致爲此奴所囚耳遂與內局令宋珪等謀誅

官奴夏四月壬午徐州行省完顏忽剌虎執王德全并其子誅之及其黨王琳楊瑣斜郊延壽召經歷商瑀用之魚山從宜嚴祿叛歸漣水庚寅陳州都尉李順兒殺行省粘葛奴申及招撫使劉天起送款于崔立張俊民李琦奔汴京王壁還歸德癸巳崔立以梁王從恪荆王守純及諸宗室男女五百餘人至青城皆及於難甲午兩宮北遷甲辰鄧州節度使移剌瑗以其城叛與白華俱亡入宋六月己卯官奴及其黨阿里合白進皆伏誅上御雙門赦忠孝軍以安反側遂決策遷蔡詔蔡魚陳穎各以兵來迓中京留守權參政烏林答胡土棄城奔蔡壬午中京破留守兼使

宜總帥強仲死之戊子召徐州行省完顏忽剌虎赴行在所以抹撚兀典代行省事郭恩為總帥兼節度使辛卯上癸歸德留元帥王壁守之壬辰次亳州癸巳以亳州節度使王進同知節度使王賓徵民丁運鐵甲糗糧留權參政張天綱董之就遷有功將士臨淄邵王王義深據靈壁望口寨以叛遣近侍直長女奚烈完出將徐宿兵討之義深敗走漣水入宋丙申亳州鎮防軍崔復哥殺守臣王賓等張天綱以便宜授復哥節度使罷運鐵甲糗糧州人乃安己亥上入蔡州詔尚書省為書召武仙會兵入援徐州行省抹撚兀典赴蔡州起復右丞相致仕賽不代行省事七

月癸卯朔曲赦蔡州管內雜犯死罪以下官吏軍民普覃
兩官經應辦者更遷一官弛門禁通衆貨蔡人使之乙巳
以烏古論鎬爲御史大夫總帥如故張天綱爲御史中丞
仍權參政完顏藥師爲鎮南軍節度使兼蔡州管內觀察
使戊申左右司郎中烏古論蒲鮮兼息州刺史權元帥右
都監行帥府事征行元帥權總帥婁室簽樞密院事己酉
選室女備宮中使令已得數人以右丞忽糾虎諫留識文
義者一人餘聽自便乙卯遣魏璠徵武仙兵丁巳護衛蒲
鮮石魯負祖宗御容至自汴勅有司奉安于乾元寺前御
史大夫蒲察世達西面元帥把撒合自汴來歸辛酉武仙

劫將士謀取宋金州至浙水衆潰行六部尚書盧芝侍郎
石玠謀歸蔡州仙追芝不及遂殺玠丁卯定進馬遷賞格
又定括馬罪格以簽樞密院事權參政抹撚兀典領其事
遣使分詣諸道選兵會于蔡己巳以蒲察世達爲吏部侍
郎權行六部尚書八月癸酉朔以秦州元帥粘哥完展權
參知政事行省事於陝西諭以蠟書期九月中徵兵與上
會于饒豐關欲出宋不意以取興元甲戌大元使王檝諭
宋還宋以軍護其行青山招撫盧進得邏吏言以聞上爲
之懼丁丑上閱兵于見山亭癸未元帥楚珩復立壽州於
蒙城詔遷賞有差州縣官皆令員授乙酉大元召宋兵攻

唐州元帥右監軍烏古論黑漢死于戰主帥蒲察某為部
曲兵所食城破宋人求食人者盡戮之餘無所犯宋人駐
兵息州南丙戌詔權參政抹撚元典簽樞密院事婁室行
省院于息州丁亥烏古論鞏權參知政事元林谷胡土為
殿前都點檢庚寅初設四隅機察官壬辰息州行省抹撚
元典以兵襲宋人于中渡店斬獲甚衆乙未萬年節州郡
以表來賀二十餘所辛丑設四隅和糴宮及惠民司以太
醫數人更直病人官給以藥仍擇年老進士二人為醫藥
官九月癸卯朔假蔡州都軍致仕內族阿虎帶同僉大睦
親府事使宋借糧入辭上諭之曰宋人負朕深矣朕自即

位以來戒飭邊將無
切責之向得宋一州
為贖朕若受財是復
生獲數千人悉以資糧
鄧州又攻我唐州彼
夏夏亡及於我我亡必
我連和所以為我者亦
許戊申魯山元帥元志
庚戌以重九拜天子節
曰國家自開創涵養汝
孔商界邊臣有自請征討者未嘗不
也即付與近淮陰來歸彼多以金幣
也付之全城秋毫無犯清口臨陣
遣之今乘我疲敝據我壽州誘我
謀亦淺矣大元滅國四十以及西
及於宋唇亡齒寒自然之理若與
為彼也卿其以此曉之至宋宋不
平兵入援賜以大信牌升為總帥
及使廳群臣陪從成禮上面諭之
百有餘年汝等或以先世立功

或以勞効起身被堅執鎗積有年矣今當厄運與朕同患
可謂忠矣比聞北兵將至正汝等立功報國之秋縱死王
事不失為忠孝之鬼徃者汝等立功常慮不為朝廷所知
今日臨敵朕親見之矣汝等勉之因賜卮酒酒未竟邏騎
馳奏敵兵數百突至城下將士踴躍咸請一戰上許之是
日分軍防守四面及子城以總帥宗木魯婁室守東面內
族承麟副之參知政事烏苦論鎬守南面總帥元志副之
殿前都點檢兀林答胡上守西面忠孝軍元帥蔡八兒副
之忠孝軍元帥權殿前右副點檢玉山兒守北面元帥紇
石烈柏壽副之遙授西安軍節度使兼殿前右衛將軍行

元帥府事女奚烈完出守東南元帥左都監夾谷當哥副
之殿前右衛將軍權左副都點檢內族斜烈守子城都尉王
愛實副之辛亥大元兵築長壘圍蔡城己未括蔡城粟辛
酉禁公私釀酒十月戊辰更造天興寶會辛巳縱饑民老
稚羸疾者出城癸未徐州守臣郭恩殺逐官吏以叛行省
賽不死之甲申給饑民船聽採城壕菱芡水草以食戊子
徵諸道兵辛卯上閱射于子城中者賞麥有差丙申殿前
左副都點檢溫敦昌孫戰歿戊戌賜義軍戰歿被創者麥
十一斤辛丑朔以右副都點檢阿勒根移失刺為宣差鎮
撫都彈壓別設彈壓四員副之四隅機察亦隸焉宋遣其

將江海孟珙帥兵萬人獻糧三十萬石助大元兵攻蔡十
二月甲戌盡籍民丁防守括婦人壯捷者假男子衣冠運
大石上親出撫軍丁丑大元兵決練江宋兵決柴潭入汝
水己卯大元兵破外城宿州副總帥高刺哥戰歿辛巳以
總帥孛朮魯婁寧殿前都點檢兀林答胡土皆權參政都
尉完顏承麟爲東面元帥權總帥己丑大元兵墻西城上
謂侍臣曰我爲金紫十年太子十年人主十年自知無大
過惡死無恨矣所恨者祖宗傳祚百年至我而絕與自古
荒淫暴亂之君等爲亡國獨此爲介介爾又曰古無不亡
之國亡國之君徃徃爲人囚繫或爲俘獻或辱於階庭閉
之空谷朕必不至於此卿等觀之朕志決矣都尉王愛實
戰歿砲軍總帥王銳殺元帥夾谷當哥率三十人降大元
庚寅以御用器皿賞戰士甲午上微服率兵夜出東城謀
遁及柵不果戰而還乙未殺尚廐馬五十疋官馬一百五
十疋犒將士

三年正月壬寅冊柴潭神爲護國靈應王甲辰以近侍分
守四城戊申夜上集百官傳位于東面元帥承麟承麟固
讓詔曰朕所以付卿者豈得已哉以肌體肥重不便鞍馬
馳突卿平日趨捷有將畧萬一得免柞胤不絕此朕志也
己酉承麟即皇帝位百官稱賀禮畢取出捍敵而南面已

立宋幟俄頃四面呼聲震天地南面守者棄門大軍入與城中軍巷戰城中軍不能禦帝自縊于幽蘭軒末帝退保子城聞帝崩率群臣入哭謚曰哀宗哭奠未畢城潰諸禁近舉火焚之奉御絳山收哀宗骨瘞之汝水上末帝爲亂兵所害金亡

替白金之物興天下莫高太祖太宗威制中國大槩欲効遼初故事立楚立齊委而去之宋人不競遂失故物熙宗海陵濟以虐政中原鯁望金事幾去天厭南北之兵挺生世宗以仁易暴休息斯民是故金祚百有餘年由大定之政有以固結人心乃古元爾也章宗志存潤色而秕政日

多誅求無藝民力浸竭明昌承安盛極衰始至於衛紹紀綱大壞亡徵已見宣宗南渡棄厥本根外狃餘威連兵宋夏內致困憊自速土崩哀宗之世無足爲者皇元功德日盛天人屬心日出燭息理勢必然區區生聚圖存於亡力盡乃斃可哀也矣雖然在禮國君死社稷哀宗無愧焉

本紀第十八

本紀第十九

金史十九

元開府儀同三司上柱國前中書右丞相監修國史

都總裁臣脫脫修

世紀

景宣皇帝諱宗峻本諱繩果太祖第二子母曰聖穆皇后
唐括氏太祖元妃宗峻在諸子中最嫡天輔五年忽魯勃
極烈果都統諸軍取中京帝別領合扎猛安受金牌既克
中京遂與果俱襲遼主于鴛鴦灤遼主走陰山耿守忠救
西京帝與宗翰等擊走之西京城南有浮圖敵先據之下
射士卒多傷帝曰先取是則西京可下既而攻浮圖克之

遂下西京太祖崩帝與兄宗幹率宗室群臣立太宗天會
二年薨熙宗即位追上尊謚曰景宣皇帝廟號徽宗改葬
興陵海陵弒立降熙宗為東昏王降帝為豐王世宗復尊
熙宗廟謚尊帝為景宣皇帝于合剌常勝查刺合刺是為
熙宗

睿宗立德顯仁啓聖廣運文武簡肅皇帝諱宗堯初諱宗
輔本諱訛里朶大定上尊諡追上今諱魁偉尊嚴人望而
畏之性寬恕好施惠尚誠實太祖征伐四方諸子皆總戎
旅帝常在帷幄天輔六年太祖親征太宗居守黃龍府安
福哥誘新降之民以叛帝與烏古迺討平之南路軍帥鶻

寶答以賊敗帝往閱實之咸稱平允天會五年宗望薨帝
為右副元帥駐兵燕京十一月分遣諸將伐宋帝發自河
間徇地淄青宋馬括兵二十萬至樂安帝率師擊破之聞
宋主在揚州時東作方輿留大軍夾河屯田而還軍山西
二月移剌古破宋臺宗雋宋忠軍五萬于大名明日再破
之獲宗雋忠而還冀州人乘夜出兵襲照里營照里擊敗
之宋主奉表請和密書以誘契丹漢人詔伐宋帝發自河
北降滑州取開德府攻大名府克之河北平初伐宋河北
河東諸將議不決或欲先定河北或欲先平陝西太宗兩
用其策而宗翰來會于濮既平河北遂取東平及徐州盡

得宋人江淮運致金幣在徐州官庫者分給諸軍而劉豫
遂以濟南降使拔离速等襲宋主于揚州而宋主聞之北
拔离速至揚州前夕已渡江矣宋主乃貶去帝號再以書
來請存社稷語在宗翰傳中既而宗弼追宋主宋主渡江
入于杭州復遜入海宗弼乃還於是婁室所下陝西五路
輒宗翰等曰前討宋故分西師合于東軍而陝西五路
雄勁當併力攻取令撻懶撫定江北宗弼以精兵二
往洛陽以八月往陝西或使宗弼遂將以行或宗輔
宗尹中以一人往上一曰婁室往者所向輒辦今專征
石豈倦于兵而自愛邪卿等其戮力焉由是詔帝往是

時宋張浚兵取陝西帝至洛水治兵張浚騎兵六萬步卒
十二萬壁富平帝至富平婁室為左翼宗弼為右翼兩軍
並進自日中至于昏暮凡六合戰破之耀州鳳翔府皆來
降遂下涇渭二州敗宋經略使劉侃軍于瓦亭原州降撒
离喝破德順軍靜邊寨宋涇原路統制張中孚知鎮戎軍
李彥琦以城降宋秦鳳路都統制吳玠軍于隴州境上招
討都監馬五擊走之降一縣而還帝進兵降甘泉等三堡
取保川城破宋熙河路副總管軍二萬獲馬千餘拔安西
等二寨熙州降分遣左翼都統阿盧補右翼都統宗弼招
撫城邑之未下者遂得鞏兆河樂西寧蘭廓結石等州定

遠和政甘峪寧洮安隴等城寨及鎮堡蕃漢營部四十餘
於是涇原熙河兩路皆平撒離喝降慶陽府豳州以環州
降既定陝西五路乃選騎兵六千使撒離喝引屯衝要於
是班師與宗翰俱朝京師立熙宗為諸班勃極烈帝為左
副元帥十二年行次媯州薨年四十陪葬睿陵追封路王
謚襄穆皇統六年進冀國王正隆二年追贈大帥上柱國
改封許王世宗即位追上尊謚立德顯仁啓聖廣運文武
簡肅皇帝廟號睿宗二年改葬于大房山號昇平陵

顯宗體道弘仁英文睿德光孝皇帝諱允恭本諱胡土瓦
世宗第二子母曰明德皇后烏林荅氏皇統六年丙寅歲

生體貌雄偉孝友謹厚大定元年十一月世宗即位于東
京乙酉封楚王置官屬十二月從至中都二年四月己卯
賜名允迪五月壬寅立為皇太子世宗謂之曰在禮貴嫡
所以立卿卿友于兄弟按百官以禮勿以儲以生驕慢曰
勉學問非有召命不須待食帝上表謝專心學問與諸儒
臣講議於承華殿燕閑觀書乙夜忘倦翼日輒以疑字付
儒臣校證九月庚子詔東宮三師對皇太子稱名少師以
降稱臣十一月庚子生辰百官賀于承華殿世宗賜以襲
衣良馬賜宴于仁政殿皇族百官皆與自後生辰世宗或
幸東宮或宴內殿歲以為常十二月辛卯奏曰東宮賀禮

親王及一品皇族皆北面拜伏臣但答揖伏望天慈聽臣
答拜庶悖親親友愛之道世宗從之以爲定制世宗聞儒
者鄭松賢松先爲同知博州防禦事致仕起爲左諭德詔
免朝參令輔太子讀書松以友諭自處帝嘗勸松使取服
帶松對曰臣忝諭德不敢奉命帝改容稱善曰是益加禮
遇每出獵獲鹿輒分賜之四年九月納妃徒留氏行親迎
禮故事大駕鹵簿天子乘玉路皇太子鹵簿乘金路六年
世宗行自西京還都禮官不知皇太子自有鹵簿金路乃
請太子就乘大駕綴路行在天子之前上疑其非禮詳閱
舊典禮官始覺其誤於是禮部郎中李邦直自外郎李山

削一階大常少卿武之才大常丞張子羽博士張稹削兩
階頃之禮官議受冊謁謝太廟服常朝服乘馬世宗曰此
與外官禮上後謁諸神廟無異海陵一時率意行之何足
爲法大冊與三歲祫享當用古禮爲是孔子曰禮與其奢
也寧儉不當輕易如此又曰右丞蘇保衡雖漢人不通經
史參政石琚通經史而不言前日禮官既已削奪猶不懼
邪其具前代典禮以聞朕將擇而處之久之將授太子冊
寶儀注備儀仗告太廟上曰朕受尊號謁謝乃用故宋真
宗故事常朝服乘馬皇太子乃用備禮前後不稱其無謂
也謂右丞相良弼左丞守道曰此卿等不用心所致良弼

等謝曰臣愚慮不及此上復曰此文臣因循故也是年十月甲申禘享于太廟行亞獻禮七年帝有疾詔左丞守道侍湯藥徙居瓊林苑臨芳殿調治八年正月甲戌改賜名允恭庚戌受皇太子冊寶帝上表謝九年五月世宗命避暑于卓樂隋王惟功從行其應從行者皆給道路費帝奏曰遠去闕廷獨就涼地非臣子所安願罷行世宗曰汝體羸弱山後高涼故命汝往丁丑百官奉辭于都城之北再拜帝答拜是月百官承詔具牋問起居六月百官問起居如前八月乙酉至自卓樂百官迎謁于都城之北如送儀丙戌入見世宗曰吾兒相別經夏極甚思憶也九月詔皇

太子供膳勿月支歲給五十萬十年八月帝在承華殿經筵太子太保壽王爽啓曰殿下頗未熟本朝語何不屏去左右漢官皆用女直人帝曰諭德贊善及侍從官曷敢輒去爽乃揖而退帝曰宮官四員謂之諭德贊善義可見矣而反欲去之無學故也有使者自山東還帝問民間何所苦使者曰錢難最苦官庫錢滿有露積者而民間無錢以此苦之帝曰貯之空室雖多奚為謂戶部尚書張仲愈曰天子富藏天下何必獨在府庫也因奏曰錢在府庫何異銅鑛在野乞流轉使公私俱利世宗嘉納詔有司議行之十一月丁亥有事於圓丘帝行亞獻禮十二年五月世宗

聞德州防禦使胡刺謀叛因曰朕於親親之道未嘗不篤而輒敢如此帝徐奏曰叔胡刺性荒縱耽娛樂而無子嗣忽如此狂謀望更閱實之十月己未禋享于太廟帝攝行祀事十二年十月承詔與趙王惟中曹王惟功獵于保州定州十一月甲午還京師十四年四月乙亥世宗御垂拱殿帝及諸王侍側世宗論及兄弟妻子之際世宗曰婦言是聽而兄弟相違甚哉帝對曰思齊之詩曰刑于寡妻至于兄弟以御于家邦臣等愚昧願相勵而修之因引常棣華萼相承脊令急難之義為文見意以誠兄弟焉十五年世宗詔五品職事官謝見皇太子十七年五月甲辰侍宴

于常武殿典食令混合進粥帝將食有蜘蛛在粥盃中混合恐懼失措帝從容曰蜘蛛吐絲乘空忽墮此中爾豈汝罪哉十月己卯禋享于太廟攝行祀事十九年四月戊申有事于太廟攝行祀事丁巳詹事烏林荅愿入謝帝命取幘頭腰帶官屬請曰此見宰相師傅之禮也帝曰愿事陛下久以此加敬爾皆曰非臣等所及十一月改葬明德皇后于坤厚陵帝徒行輓靈車遇大風雪左右進雨具上却之比至墳所衣盡濡濕觀者無不下淚海陵雖貶黜為庶人宗幹尚稱明肅皇帝議者以為未盡帝且表奏論世宗嘉納之於是宗幹削去帝號降封遼王二十四年世宗將

幸上京詔帝守國作守國之寶以授之其遣使祭享五品
以上官及事利害重者遣使馳奏六品以下官其餘常事
並聽裁決每三日一次於集賢殿受尚書省啓事京朝官
遇朔望具朝服問候車駕在路每二十日一遣使問起居
已達上京每三十日一問起居世宗曰今巡幸或能留一
二年以汝守國譬之農家種田商人營利但能不墜父業
即爲克家子也帝對曰臣在東宮二十餘年過失甚多陛
下以明德皇后之故未嘗見責臣誠愚昧不克負荷乞備
扈從世宗曰凡人養十皆望投老得力朕留太尉左右丞
參政輔汝彼皆國家舊人可與商議且政事無難但用心

公正無納讒邪一月之後政事自熟帝流涕駭辭左右爲
之感動三月世宗如上京帝守國留中都初帝在東宮或
携中侍步于芳苑中侍出入禁中未嘗限阻此輩見帝守
國各爲得意帝知之謂諸侍中曰我向在東宮不親國政
日與汝輩語話今旣守國汝等有召命然後得入五月世
宗至上京賜勅書曰朕以前月八日到遼陽此月二日達
上京翌日祀慶元廟省方觀民古之制也汝守國任重夏
暑方熾益當自愛無貽朕憂帝謂徒單克寧曰車駕巡幸
以國事見屬刑名最重人之死生繫焉凡有可議當盡至
公比主上還都勿有廢事自是凡啓稟刑名帝自披閱召

都事委曲折正移晷忘倦或賜之食近侍報瑤池位蓮開
當設宴帝曰聖上東巡命我守國何敢宴遊廢事採致數
花足矣七月遣子金源郡王麻達葛奉表問起居請世宗
還都十一月壬寅帝冬獵辛亥還都二十五年正月乙酉
免群臣賀禮帝自守國深懷謙抑宮臣不庭拜啓事時不
侍立免朔望禮京朝朔望日當具公服問候並停免至是
群臣當賀亦不肯受甲寅帝如春水二月庚申還都丁卯
遣子金源郡王麻達葛奉表賀萬春節四月久不雨帝親
禱即日霑足六月甲寅帝不豫庚申崩于承華殿世宗自
上京還次天平山好水川計聞為位臨奠于行宮之南大

慟者久之親王百官皇族命婦及侍衛皆會哭世宗號泣
還宮比至中都為位奠哭者凡七焉世宗以幽王未成爲
中都留守來護喪遣滕王府三史再興御院通進阿里刺
來保護金源郡王遣左宣徽使唐括鼎來致祭詔妃徒單
氏及諸皇孫喪服並如漢制帝在儲位久恩德在人者深
每旦三時哭臨侍衛軍士皆哭入臨伏哭于承華殿下聲
殷如雷中都百姓市門巷端皆泣慟哭七月壬午朔賜謚
宣孝太子九月庚寅殯于南園熙春殿己酉世宗至自上
京未入國門先至熙春殿致前慟哭久之比葬親臨者六
帝事世宗凡巡幸西京涼陞以上陵祭廟謁行慶宮田獵

觀稼拜天射柳未嘗去左右上有事于圓丘及親享于太廟則行亞獻禮不親祀則攝行祀事國有大慶則率百官上表賀正曰萬春節則總班上壽冬十月庚戌朔宰相以下朝見于慶和殿太尉完顏守道上壽世宗追悼愴者久之十一月甲申靈駕發引世宗路祭于都城之西庚寅葬于大房山世宗欲加帝號以問群臣翰林脩撰趙可對曰唐高宗追謚太子弘為孝敬皇帝左丞張汝弼曰此蓋出于武后遂止乃建廟于衍慶宮後祭用三獻樂用登歌二十六年立子璟為皇太孫二十九年世宗崩太孫即位是為章宗五月甲午追謚體道弘仁英文睿德光孝皇帝

崩號顯宗丁酉祔于太廟陵曰裕陵帝天性仁厚不忍刑殺梁檀兒盜金銀葉憐其母老李福興盜段匹值坤厚陵禮成家令本把盜銀器值萬春節皆柔出全活之亡失物者責其償而不加罪聞四方饑饉輒先奏加賑贍因田獵出巡所過問民間疾苦敬禮大臣友愛兄弟葬明德皇后于坤厚陵諸妃皆祔自警寧宮發引趙王惟中以其母輜車先發令張黃蓋者前行帝呼執蓋者不應少府監張僅言欲奏其事帝止之嘗作重光座銘及刻左右銘于小玉碑并刻其碑陰皆深有理致最善射而不殫物嘗奉詔拜陵先獵射一鹿獲之即命罷獵曰足奉祀事焉用多殺好

生蓋其天性云

贊曰遼王杲取中京宗翰宗望皆從景宣別領合札猛安合札猛安者太子之猛安也宗翰請立熙宗宗望不敢違太宗不能拒其義正其理直矣舊史稱濟宗寬恕好施惠熙宗不終海陵墮斃自時厥後得大位者皆其子孫有以夫顯宗孝友惇睦在東宮二十五年不聞有過承意開導四方陰受其賜天不假之年惜哉

本紀第十九

